



Irwan (tengah) bersama sebahagian peserta akhir Anugerah 'The Rice Bowl Startups' pada majlis pelancaran awal 1AES 2015 di Kuala Lumpur, semalam.

[FOTO SURIANIE MOHD HANIF/ BH]

KERAJAAN TUMPU MAJUKAN USAHAWAN MUDA

» Sedia dana, akses pasaran angkat perniagaan ke peringkat antarabangsa

Oleh Mahanum Abdul Aziz
mahanum_aziz@bh.com.my

Kerajaan akan menumpukan usaha memajukan usahawan muda tempatan ke peringkat antarabangsa dalam Bajet 2016 yang akan dibentangkan pada 23 Oktober ini.

Tumpuan turut diberikan terhadap usaha memajukan usahawan belia Bumiputera ke arah mengangkat perniagaan mereka ke peringkat yang lebih tinggi dengan

menembusi pasaran serantau dan global.

Ketua Setiausaha Perbendaharaan, Tan Sri Dr Mohd Irwan Serigar Abdullah, berkata kerajaan akan menyediakan peruntukan untuk menjadikan usahawan muda tempatan berjaya pada peringkat antarabangsa.

Majukan perniagaan

Katanya, ramai usahawan muda yang masih memerlukan bantuan dari segi dana dan akses pasaran untuk memajukan perniagaan ke peringkat yang lebih tinggi.

Beliau berkata, kerajaan juga komited untuk meningkatkan jumlah produk tempatan untuk dipasarkan pada peringkat antarabangsa bagi memenuhi permintaan yang semakin meningkat di luar negara.

"Bajet (2016) akan turut menumpukan usaha memajukan usahawan muda dan kita akan sediakan peruntukan untuk menjadikan mereka usahawan yang berjaya

pada peringkat antarabangsa," katanya.

Beliau berkata demikian selepas merasmikan majlis pelancaran awal Sidang Kemuncak Keusahawanan 1ASEAN (1AES) 2015 di Kuala Lumpur, semalam.

Selain itu, Irwan berkata, Bajet 2016 akan turut menumpukan kepada isu menjamin

"Bajet (2016) akan turut menumpukan usaha memajukan usahawan muda dan kita akan sediakan peruntukan untuk menjadikan mereka usahawan yang berjaya pada peringkat antarabangsa"

Mohd Irwan Serigar Abdullah,
Ketua Setiausaha Perbendaharaan

kesejahteraan rakyat seperti menyediakan rumah mampu milik dan memastikan kos sara hidup yang berpatutan.

Beliau menegaskan, Bajet 2016 adalah bajet rakyat, justeru, banyak perkara akan ditumpukan kepada rakyat.

Ringgit tak jejas

Sementara itu, ditanya sama ada kelemahan ringgit menjejaskan usaha untuk melahirkan ramai usahawan muda tempatan, Irwan berkata, kelemahan ringgit tidak akan menjejaskan perkara itu.

Lagipun, katanya, produk yang dibangunkan usahawan muda di negara ini menggunakan barangan tempatan dan bukannya mengimport dari luar negara.

Justeru, beliau berkata, dengan menggunakan barangan tempatan, produk yang dibangunkan itu mempunyai kelebihan dari segi kos berbanding produk di luar negara.

"Dari segi kos, kita lebih berdaya saing dan kos kita lebih murah dengan penggunaan barangan tempatan," katanya.

